



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8



Myanmar tir Min Aung Hlaing-i
Thailand semdang

Salah-i Trabzonspor den küm ana
atema tenangzüktepba yanglu



VOL. XXIII ISSUE NO. 295 (ADOK 295) DIMAPUR ROGONÜ (FRIDAY) LUROI (AUGUST) 07, 2026

₹ 5.00

MP Supongmeren Jamir-i Centredang Nagapolitical agreements mapa kuma inyaksü ajungshi

Dimapur, Luchii/August 06 (TYO): Brehostibarnü Nagaland nungi Member of Parliament (Lok Sabha), S Supongmeren Jamir-i India sorkar dang tekeratiba nung Naga political agreements mapa kuma inyaksü ajungshi aser mapang talangka atsülangba ajanga Naga nunger teimla samar ta ashi.

Lok Sabha nung Rule 377 kübok iba ken o benoka jembidang pai Ato Kilonser Narendra Modi aser Union Home Minister Amit Shah dang NSCN (IM) den 2015 Framework Agreement zülutepa aliba aser Working Committee of Naga National Political Groups (WC-NNPG) den 2017 Agreed Position zülutepa aliba mapa kuma inyaksü ayongzüka liasü.

Nagaland Pradesh Congress Committee (NPCC) ajanga sangdong ka agütsüba nung ashiba agi, August 3, 2015 nung Framework Agreement zülutepa küm 11 süyio go aser November 17, 2017 nung Agreed Position zülutepa küm toku jungnüa arur, saka tang tashi agreement kata

mapa kuma meinyaki lir ta Jamir-i ashi.

Pai ashiba agi, mapang talangka menua aliba ajanga Naga nunger tsüngda mangatetep aser tejashi adokdaksür, aser India sorkari jembishinü tembangogo ta shia arur asünungji, tangbo jembishinü nung masü mapa kuma inyakba nung rangloksüla.

Pai Centre dang iba tezüngzüktep akumtsüboa tali memunutsü ajungshi aser tanen makai mapa meinyakba ajanga nüburtemi temulung mesüi akumtsü aser temulung masüba telok tali adoka yimjung inyakyim nung kongshitsü akok, ta ashi.

Item tezüngzüktep ya ochishia inyaksüla aser final settlement nung aliba ajak Naga nunger nem metetdaksütsüla, ta pai ashi.

Political settlement koba südir süaka, Naga nungeri jangraba aser aginüba ama asütsüla aser nüburtemi tamang katettsüsa ochishia inyaksüla, ta Nagaland MP (Lok Sabha), S Supongmeren Jamir-i nenshia ashi.

Chümoukedima nung power supply raksa

Dimapur, Luroi/August 06 (TYO): Brehostibar nep Ganeshnagar sub-station nung aliba 33/11kV, 5 MVA power transformer ka nung technical timtem ajurua Chümoukedima district kübok tesem aika nung power supply nung kongshia lir, ta Department of Power ajanga metetdaksü.

Department-i ashiba agi, August 6 anepdang 3:00 ako

meta transformer nung 'technical fault' adokba ajanga Ganeshnagar sub-station nungi belenshiba Aqahuto, Dhansiripar, Doyapur, Hebron Camp area, Razaphe aser temeket yimtsüngtem nung consumers ajunga power makai akum. Tekeraba nung transformer melener power supply agütsütsü atema meranga inyaktar, ta department-i ashi.

NH-202 anepalutsü atema Centre-i sanction agütsüogo: TR Zeliang

NH-202 STMC Package-wise Allocation				
Package	Stretch	Sanction Amount	Contractor	Status
1	Chare Km 39-60	₹3.46 crore	A Phongshi Phom	Awarded
2	Km 60-90	₹4.28 crore	A Phongshi Phom	Awarded
3	Km 90-120	₹4.59 crore	Innovative Construction / M/s Chittaranjan Saha & Others	Pending
4	Km 120-150	₹4.36 crore	M/s Hi-Tech & Co.	Awarded
5	Km 150-177	₹4.21 crore	M/s G.B.S. Tech Enterprises	Awarded
6	Km 177-202	₹3.90 crore	M/s Zeligzhu & Sons	Awarded
7	Km 202-227	₹4.13 crore	M/s Zeligzhu & Sons	Awarded
8	Km 227-252	₹4.13 crore	M/s Zeligzhu & Sons	Awarded
9	Km 252-283	₹4.52 crore	M/s Zeligzhu & Sons	Awarded

Other National Highway Maintenance Works				
Highway	Stretch	Division/District	Sanction Amount	Contractor
NH-329A	Km 38.63-72.27	—	₹4.60 crore	M/s G.B.S. Tech Enterprises
NH-2	Km 220-240	Mokokchung Division	₹3.61 crore	Punia Construction Company
NH-702A	Km 128-173	Phek Division	₹4.60 crore	M/s Zeligzhu & Sons
NH-702A	Km 176-221	—	₹4.59 crore	M/s Zeligzhu & Sons

Dimapur, Luroi/August 06 (TYO): Ministry of Road Transport and Highways (MoRTH) ajanga National Highway-202 atema one-year Short Term Maintenance Contract (STMC) agütsüogo, koba ajanga Tuensang, Shamator, Kiphire aser Meluri districts tem nung iba lenmang 244 km awajemtsü, ta Deputy Chief Minister and minister in-charge of National Highways, TR Zeliang-i Brehostibarnü sangdong.

Ibai Nagaland anüdoklen aliba nüburtem asoshi mapang shidak nung agizükba alitsü aser lenmang anepaluba mapa ya Chare-Meluri stretch nung packages balala lemsar inyaksü, ta Zeliang-i ashi. Open tendering

mapa tembangogo aser tekeratiba nung work orders agüja contractor temi memonui mapa tenzüksü, ta ashi.

Tawa tzunglu kanga sashia aruba ajanga region nung teraksa jenti ajurua lir, anungji contractors ajungai work orders anguba den külemi mapa inyak tenzüksüla, ta Zeliang-i ayongzü.

Contract agreements nung shia aliba ama mapa shidak inyaksüla, ta pai ashi.

Deputy CM-ia nüburtem dang mapa inyaktertem den amalitep akatsü ayongzü aser mapa shidak inyak-meinyak meita reprangtsü shia liasü.

NH-202 den ano Zeliang-i NH-329A, NH-2 aser NH-702A densema tanga national

highways nunga anepalu mapa inyaksü indang sangdong aser item projects talila inyakba ya ajanga sorkari state tesem ajungalen lenmang tesendaktep tajungba kumdaksütsü atema maneni meranga inyakba sayur ta ashi.

NH-202 indang Chare-Tuensang section two-lane highway kuma yanglutsüba nung mapang agiba tebilemtsü nung telangzüba agüja, state sorkari iba project asoshi bendanga agütsür inyaker aser MoRTH den iba sanction bushitar, ta Zeliang-i ashi.

Nüngdakba Right of Way atema ali agitsüba dak sendakba ken o mebenteti aliba nungi tenzüka iba project menudaksür. State sorkari state indang tapet ozüng kübok agitsü bushi, saka ministry-i iba maparen ya National Highways Act, 1956 kübok inyaksüla ta ashir. Iba yagi NH-202 kisüng masü saka Nagaland nung tanga National Highway ishika nung kongshia lir, ta Dy. CM Zeliang-i ashi.

Iba ken o ya Union Minister for Road Transport and Highways den July 16 nü jembio go aser iba sülen July 20 nü MoRTH Secretary den jembishinüa liasü, ta pai ashi. Ministry-i tekeraba nung telemteba tajung ka agia mapang talangka nungi anendaka aliba two-lane project tenzüksü sorkar teimla lir, ta Zeliang-isa ashi.

Interlocutor tasen meshiba ya Naga nunger mezüngmeshiba lir: WC, NNPGs

Dimapur, Luroi/August 06 (TYO): Kohima nung aliba Indian constitutional outpost, koba dang Nagaland state government ta ajar, parnoki tanü Indo-Naga ken o nung interlocutor ama union minister ka akhangar. Yangji tasüngdangba kar adoker, kechiaser 2000s mapang Oscar Fernandes, Prithviraj Chavan aser Raghupathi nunger ama Indian ministers tem Indo-Naga ken o nung ministerial team liasü. Parnoki kechi takok angu? Parnoki takok kecha mongutet, ta WC, NNPGs sangdong ka ajanga ashi.

Indo-Naga yimten ken o jembiba takok ngua tembangogo, anungji nüngdak süra interlocutor ama minister ka meshitsü ya jembishinü nung yarisemer mapa masü saka jembishinü asürtem mapa lir. GoI-NNPG jembishinü tembangogo. Iba ama nübu anepalutsü menügdak. Ibai

tembanga jembir aliba Indo-Naga political solution raksatsütsü tasa lir. Yimya tamajung amshia mesüshiba ya aibelen bulu lir aser renema aliba raksatsür nem puti otsüi tatok magütsütsü, ta parnoki ashi.

Minister jenjang nung interlocutor ka akhangba ya kanga dang shisa maka aser Naga nunger atema majung. Küm aika Naga nunger sempet aser nübu amajok kumdaksüba mezüngshiaka küm aika Government of India (GoI) aser Naga nunger tsüngta bendanga agütsür jembishinüa aruba mamadoktsüla. Shisa ramaba, temulung magütsüi jembiba aser nüburtem anema yimya tamajung amshiba tejangja ajiteter.

Yarisemer temi yimten ken o jembir indang oshi jembir, aser tebilemtsüji aji lir. Parnoki Naga political movement ya 'commercialized' süogo. Parnok constitutional posts

nungi anena "Naga National Political Party" tasen ka tenteter interlocutor tasen den jembishinü tasen tenzü nungbo onoki pelashishia agizüksü, ta WC, NNPGs ajanga ashi.

Yarisemer ama Nagaland nungi elected representatives indang telok kati komasür jembishinü tembanger aliba nung GoI nem 'condition' agütsür? Indo Naga Political Solution tekeraba nung asangsang akumba nung yarisemtsü atema Nagaland Legislative Assembly nung opposition maliba sorkar ka tentet, anungji Nagaland state sorkari "Special assembly session" ka jazüka GoI dang tekeraba nung mapa kuma inyaksü ayongzüksü mapang tongja tongogo, aji mesüra parnoki Framework Agreement mesüra Agreed Position ya magizüjer ta sangdongtsüla, ta ashi.

Parnoki Indo-Naga yimten

ken o ketdangsütsü kanga jangrara, legislative assembly shibangang aser parnoki negotiators ama shidakba inyaknüra parnoki interlocutor tasen mesüra Indo-Naga yimten ken o tanga asoshi takhangba agütsütsüla, ta WC, NNPGs ajanga ashi.

Election ajanga shiba nisungtemi teraksatsür mapa inuakba ya Indian constitutional framework dena mapet mesüra renema jembir aliba Indo-Naga agreement indang tanüla aser tangatetba akumtsüboa amshiba masü. Parnoki ya linük anema otsü ka yanglur.

Indo-Naga ken o dak sendakba nung jembishinür aliba FA aser Agreed Position indang tejangja India indang Ato Kilonser, Kilo Kilonser aser Nagaland state indang Chief Minister ket nung lir.

2019 nungi WC, NNPGs ajanga yimjak nung Naga nunger tebilemtsü shisadangsü asoshi

'practical solution' tajungtiba lemsatapa arur. STATUS PAPER ya kanga junga yanglu aser terata makai Nagaland aser tanga state nung Naga ancestral territories atema political aser administrative solution tajungtiba yanglutepa mulungtepogo. Nagaland sorkari 'negotiated documents' ya asadanger na? Taoba Nagaland Angh R.N Ravi-i January 17, 2021 nü Nagaland Legislative Assembly nung jembidang, "Jembishinü takok ngua tembangogo, tang tashinung tajangzü k ngua aliba nung ajemdaker yangertsü meranga aser final inking atema mera agitsü menügdaker," ta ashiba dak alaka tanü tashi state sorkari nungi iba status paper dak sendakba nung telangzüba kecha agüja mali. Purapujiba nguogo aser angashio go, anungji minister level interlocutor akhangba ya Naga nunger tangatetba aser mulungsentsü mezüngmeshiba ka dang lir, ta WC, NNPGs ajangasa ashi.

Dimapur nung moko azüokba jenjang asadanga senden amen



National Tobacco Control Programme (NTCP) kübok ADC Dimapur indang office chamber nung August 6, 2026 nü District Level Coordination Committee (DLCC) senden ka amendang tangokba noksa nung ADC Dimapur, Dr. Diana Patton den ketdangsürtem aser CSOs nungi lenirtem angur.

Dimapur, Luroi/August 06 (TYO): National Tobacco Control Programme (NTCP) indang District Level Coordination Committee (DLCC), Dimapur senden ka Additional Deputy Commissioner, Dimapur indang office chamber nung August 6, 2026 nü mena liasü.

Iba senden ya Additional Deputy Commissioner, Dr. Diana Patton menden sür amen aser sorkar indang department balala, kakat reju, law enforcement agencies aser civil society organisations nungi lenirtem dena liasü.

Dr. Diana Patton-i züngsem tasentem pela agizükba o jembis aser moko azüokba mapa tashi itshitsü asoshi tetsür aser civil society organisations dak tashi aliba lemsatepa liasü.

Grassroots level nung lokti tebilemsü koktettsü asoshi tetsür temi tongtipang shilem agir aser Nagaland ya nüburtem dak ajemdaka aliba lokti asünungji, moko azüokba mapa nung takok angutsü atema CSOs temi shilem tulu agitsü nüngdaker, ta lai ashi.

Lai CSOs tem dang Cigarettes and Other Tobacco Products Act (COTPA), 2003 indang awareness sentong ya kakat rejutem nung kisüng masü saka yimtsüng aser kiyong nunga ayongzüka agütsütsü ajungmesoa liasü.

Moko azüokba ozüng shidak

amshitsü atema sorkari 'enforcement squads' tenteta lir, saka takok angutsü atema lokti tentet temi amalitep akaba aser yariba nung keta lir, ta ashi.

Nüburtemi shilem magira, sentong tajungtiba jia takok mangutsü, anungji moko maliba lokti ka kumdaktsütsü asoshi stakeholders ajunga lungjemer inyaksüla, ta Dr. Patton-isa ayongzüka.

Iba senden nung District Nodal Officer, National Tobacco Control Programme (NTCP), Dr. Esther Choppy-i Dimapur tesem balala nung moko azüokba mera takok ngua agitsü atema district administration nungi teyari tali agütsütsü ayongzüka liasü.

Dr. Choppy-i district nung moko azüokba jenjang lemsatepba mapang, mapang shia awareness campaigns agiba, enforcement drives aser nüburtemi shilem agiba ajanga moko amshiba terabo ajemogo ta ashi.

Global Adult Tobacco Survey (GATS) athishia jembidag, Nagaland nung moko amshiba ya 2009-10 nung shilem 56.8 aliba nungi 2016-17 nung shilem 43.3 kumogo aser moko achiba ya shilem 31.5 aliba nungi shilem 13.2 kumogo aser mokozi maliba moko amshiba shilem 45.3 nungi shilem 39.0 kumogo, ta lai ashi.

Lai COTPA Act, 2003 nung tongtipang teinyaktsütem kar

lemsatepba mapang, nüburtemi amshiba tesentem nung moko achiba nokdangba, tanur dang mesüra tanuri moko oset ayokba nokdangba aser kakat reju temeket am 100 telungzüka nung moko oset ayoktsü memelaba indang lemsatepa liasü.

Lai kakat rejutem, tsürabor aser nüburtem dang pei tanurtem moko alitsü meyoktsü ajungshi aser police aser district administration dena mapang shia enforcement drives aotsü nüngdakba nenshia ashi.

Iba sentong atema ita asem asoshi sen 10,000 dang angur, koba kanga ajema lir, anungji district administration-i senotsü aser logistic teyari tali agütsütsüla, ta laisa ajungshia liasü.

Tobacco-Free Educational Institutions sentong kübok terenlok aliba indang Dr. Choppy-i lemsatepdang, Dimapur district nung kakat reju 151 nung 'tobacco-free' sangdongogo aser item rongnung schools 138 aser colleges 13 alitsü, ta ashi. Iba den district nung yimtsüng pezüi 'tobacco-free' sangdongba ajanga kakat reju aser nüburtemi moko azüoktsü asoshi mera agiba nung shilem agiba sayur, ta metetdaksü.

Parnoki district nung National Tobacco Control Programme takok ngua inyaksü atema department balala tsüngta amalitep tali akatsü nüngdakba indang jembia liasü.

Employment & Entrepreneurship atema Mokokchung nung Sub-committee tentet

Dimapur, Luroi/August 06 (TYO): Sempet aketba lanurtem anitetsü aser pei peria aliba rongsenketzüng adokdaksütsü asoshi mera tajung ka agia Deputy Commissioner, Mokokchung, Ajit Kumar Verma-i District Skill Committee, Mokokchung kübok Sub-committee ka tentetba osang metetdaksüogo.

Tongtipang stakeholders tem kanga junga teka amteper district tesem ajunga nung skill development, entrepreneurship aser sustainable livelihood ajungkettsü nükjidong nung iba committee tasenba ya tenteta liasü.

Iba Sub-committee nungya Additional Deputy Commissioner, Mokokchung ya Convener asütsü aser T. Imlisunep Ao (Principal, Government ITI, Mokokchung) ya Member Secretary alitsü.

Züngsem nungya Lipokonen Jamir (Joint Director, SARS & tir, Mokokchung Ao Officers

Telongjem); Dr. P. Tiatemsu (Associate Professor, Fazl Ali College); Tir, Ao Kaketshir Mungdang (AKM); Youth Secretary, ABAM, Impur; Lanuakum (Deputy Chairperson, Mokokchung Municipal Council); Representative, Ao Lanur Telongjem; Lanusenla (Principal, ICIT, Mokokchung); Lucy Lhousineino (District Employment Officer, Mokokchung) aser SDO (C)/EAC (Dev) nungertem alitsü.

Committee yagi district indang socioeconomic landscape tajungba kuma melenshitsü asoshi mera agitsü. Parnoki district nung 'skill gaps' temeja jangjateta district nung rongsenketzüng dak apet rongsen lenmang aruba maongka bushitsü.

Parnoki sorkar indang departments, kakat reju, industry bodies, aser lokti tentet balala lungjemdaksütsü atema rangloker inyaksü. Committee yagi maparen tasen apitetba,

entrepreneurship aser 'market-ready vocational training' nung temulung agüja lanur aser tetsür nem tashi agütsütsü asoshi inyaksü.

Ajidang masü parnoki akhi mapang nungi amshia aruba sempet, local crafts aser indigenous knowledge wazüka ayutsü aser 'commercialize' südaktsütsü atema inyaksü.

Shirak terenlok alitsü aser ochishia inyaksü mechi Sub-committee ya ita nung khenbosa ajuruteptsüla. Parnoki inyakyim shidak asadangtsü, yimya tajungtem jangjatsü aser ita shia parnok inyaksangshi, tebusshitba aser tongtipang onük tem Deputy Commissioner nem indang-indanga agütsütsü.

Chairperson-i melaba sülen committee yagi subject-matter experts aser department nungi ketdangsürtem anioka item terenlok mapa inyaksü asoshi lenmang bushitsü.

Nagaland CEO-i political party tem den senden amen

Dimapur, Luroi/August 06 (TYO): Nagaland nung electoral roll indang Special Intensive Revision (SIR) dak sendakba nung Chief Electoral Officer, Nagaland, Bhagyashree Banayat, IAS-i political party tem den senden ka August 6, 2026 nü mena liasü.

Iba senden nungya BJP, INC aser NPF nungi teshimtet lenirtem dena liasü.

Senden nung training, Enumeration Forms menünga aser SIR inyakyim indang yimya balala rasaa ashi.

CEO Nagaland ajanga political party tem dang Booth Level Agents shimtsü tongtipang lir ta nenshia ashi aser tang tashi meshim lira shimtsü metetdaksü aser SIR takok ngua inyaksü atema amalitep akatsü ayongzüka liasü.

Tuli nung I-Day atema senden amen

Dimapur, Luroi/August 06 (TYO): 80 buba Independence Day anogomung atema shisa lemsatepba senden ka Dubashi Court, Tuli Sub-Division nung August 6, 2026 nü Additional

Deputy Commissioner, Tuli, Imsenperong Wati, NCS mendenpuba sür mena liasü.

Iba senden nung Heads of Departments, kakat rejung nungi teshimtet nisungtem aser stakeholders tem dena liasü.

Shamator nung 6 buba Millet Festival mungogo



Dimapur, Luroi/August 06 (TYO): Bresthibarnü Shamator Town nung aliba Public Ground nung "Grow Millets, Grow Wellness" omen kübok 6 buba Millet Festival ayongzüka aluyimer, nübur lenirtem, sorkar ketdangsür aser development organisations tem lungjemer jenjang lu ayimtsü tali ajungshitepa liasü.

Iba benjong ya Millet Sisters, SEWA Shamator District, North East Network (NEN) aser Millet Network of India (MINI) ajanga Department of Agriculture aser Department of Social Welfare, Shamator den lungjemer ayongzüka liasü.

Sentong akhumdong ama NPF Central Farmers' Wing tir aser Managing Director, Okusa Toyota Pvt. Ltd., Y. Vikheho Swu dena pai iba benjong semzüksü aser exhibition stalls tem sema jaja liasü.

Iba sentong nung Swu-i jembidang Naga kin balala tsüngta telungjem aser ochi alitsü nüngdakba nenshia ashi.

Alima nung jenjang timtiba züsentetba linükji India ya lir, aser Nagaland nunga mela mela jenjang züsentettsüsa nükla tajung lir, koba ajanga aluyimer rongsen renloksü aser nüburtem health tajungba kumdaktsütsü, ta pai ashi.

Pai aluyimer tem dang modern agricultural technologies amshitsü aser tekong lu ayimya yimya wazüka ayutsü ayongzüka liasü.

Paisa Nagaland indang Agriculture Policy tasenba ajanga aluyimer ajangzüksü imlaba lemsatep aser lanurtem dang aluyimba nung temulung

agütsütsü ajungshia liasü.

Nagaland nung Shamator ya district 16 buba akumba asoshi pai pelaba lemsatep aser nüburtem dang telungjem nung alitsü ayongzüka aser maneni tejakleni renloka aotsü imlaba lemsatepa liasü. Paisa Chief Minister aser NPF tir Neiphiu Rio-i salem shiokba lemsatepa liasü.

Millet Sisters indang convenor Tsusola-i iba sentong nung pela agizükba o jembidang, food security, nutrition tajungba kumdaktsütsü asoshi jenjang lu ayimba asendenshitsü tongtipang lir ta ashi.

Akhi mapang jenjang ya tongtipang chiyongsü liasü, saka jang bulua akumba sülen samaa ao, ta District Agriculture Officer, Shamator, L. Kivika Choppy-i ashi.

Tesüiba mapang department-i jenjang nung temulung kangabo magütsü, saka National Food Security Scheme kübok department-i jenjang lu ayimtsü ajungshir aser jenjang lu ayimba yimtsüngtem nem teyari agütsür, ta paisa ashi.

Advisor, SEWA Nagaland and Vice President, SEWA Bharat, Wekoweu Tsuha (Akole)-i iba benjongmung ayongzüka nükjidong lemsatep aser Yimkhiung Women Organisation tir K. Ester-i Medical Ward nungi Yinsola Yimkhiung nem Highest Millet Producer Award agüja liasü.

Aluyimer tenüng nung Leangkongru Village nungi Anong Lucy-i o tatsüka jembia liasü aser Tshekhroweu T. Mero, Associate Project Lead of North East Network ajanga melepzüng o jembis.



New Delhi, August 06, 2026: Brihostibarnü Parliament kima Samajwadi Party MP Anand Bhadauria aser Congress MP, Sanjna Jatav na den opposition MP temi Ayodhya nung Shri Ram Janmbhoomi tekülem ki tenla auyaba anema longkak aitba noksa nung angur.

Mapa manguba ya linük tebilemtsü onük ka lir: Abhijeet Dipke

New Delhi, August 06 (Agencies): Cockroach Janta Party (CJP) tentetsang, Abhijeet Dipke-i, CJP-i mapa manguba tebilemtsü ya linük tebilemtsü onük ka ama züngshitsü, kechiyong linük nung mapa manguba ya tebilemtsü onük tuluka lir, ta ashi.

Brihostibarnü CJP core team senden tembangba sülen Maharashtra kübok Chhatrapati Sambhajinagar jila nung osangbenertem den jembidang Dipke-i iba osang ya metetdakja liasü. Bodhbar nungi tenzüka Dipke'er kidang CJP core team senden amen.

CJP otongdartem- Saurav Das aser Ashutosh Ranka na densema lenir aika osangbenertem senden nungji liasü.

NEET paper leak asüba aser public exam balala nung

ochimashi anema CJP leniba nung kaketshirtemi Jantar Mantar nung mapang talangka longkak aita aruba sülen tesüsa Union Education Minister Dharmendra Pradhan-i menden nungi anena liasü.

Dipke-i, "Kaketshirtemi longkak aitba ajanga takok tuluba angubaji Dharmendra Pradhan-i menden nungi anenba ya lir. Longkak aitba nung shilem agirtemji kaketshirtem dang masü saka mapa manguba lanurtema aika liasü," ta metetdaksü.

"Mapa manguba ya kanga tongtibat tebilemtsü onük ka lir, anungji onoki iba onük ya linük atema tongtibat onük ka kümdaktsütsü. Shisaliok nung temelenshi adoktsü atema onoki inyaksü. School mapang nungi tenzüka shisaliok angutsü ya jenjang kanga tasak. Shisaliok ya senotsü tajangzük angutsü

atema amshir, ajisüaka onoki iba nung ya temelenshi adokdaksüner," ta Dipke-i metetdaksü.

Dipke-isa, "Tang linük nung nütsüng shilem 60 bo arrshi küm 35 ser tekübokpurtem lir aser Jantar Mantar nung longkak aitertema iba zünga lanurtem liasü," ta metetdaksü.

Bodhbarnüa osangbenertem den jembidang Dipke-i, judiciary, Election Commission, yimtenren party tem aser media ama tongti rejutem tanaben asentenshitsü atema linük tesem ajaklen nüburtemi shilem agitsü nüngdak, ta metetdakja liasü.

Dipke-i, tawa Jantar Mantar nung "Chalo Sansad" sentong nung aikati CJP pusema liasü, aser iba ya ajanga iba ya kaketshirtem tebilemtsü onük atema dang masü reju balala meshidakba atema nüburtem tejashi sayuba liasü, ta ashi.

PM Netanyahu aser PM Modi nati West Asia tensa atema jembibi

New Delhi, Luroi/August 06 (Agencies): Brihostibarnü Israel Ato kilonser, Benjamin Netanyahu-i Ato kilonser Narendra Modi dangi phone call süa lenir anati West Asia tensa atema jembiba den külemi India-Israel special strategic partnership asadangogo.

Modi aser Netanyahu nati linük anaprongla tajangzük angutsüsa sector balala nung maneni amalitepa inyaksü bangjemshiogo.

"Tanü Israel Ato kilonser Benjamin Netanyahu-i Ato kilonser Narendra Modi den phone ajanga jembio. Lenir anati India-Israel Special Strategic Partnership asadang aser maneni linük anaprongla tajangzük angutsüsa sector balala nung ano taliba amalitepa inyaksü atema tenati bangjemogo," ta ketdangsertem sangdong ka ajanga metetdaksü.

"Ato kilonser Netanyahu aser Ato kilonser Modi natisa West Asia tensa dak sendakba nung tebilemba lemsatepogo. Lenir anati maneni tongtepratepa alitsü bangjem," ta kasa sangdong ajanga metetdaksü.

West Asia nung rara tenzüka sülen ita trokbuba nung ayaokogo, aser iba rara anentsü atema ano mapang talangka agitsü akok.

Iran-i, Strait of Hormuz dak sendakba nung Oman den tezüngzüktep agitsü atema parnoki 'draft' ka renemdar, ta metetdaksüogo.

Alima nung totzü aser natural gas shibelenba shilem 20 bo Strait of Hormuz ajanga belener, ajisüaka taküm February ita nung US aser Israeli nati Iran maaka rara tenzüka sülen Iran-i 'Strait of Hormuz' shibangba ajanga linük aikati timtem ajangshir.



August 06, 2026 nü Lucknow nung Bahujan Samaj Party (BSP) Tir, Mayawati-i party MLA Uma Shankar Singh mangjak nung akhüm agütsüdang tangokba noksa nung angur. Züngsem 403 aliba Uttar Pradesh state assembly nung Bahujan Samaj Party (BSP) nungi MLA ji Singh dang liasü.

2025 küm Modi-i linük balala semdangba nung sen crore 187 indok

New Delhi, August 06 (Agencies): 2025 küm Ato kilonser Narendra Modi-i, US, UK, France, China aser Japan densema linük 23 semdangba mapang nung sen crore 187 indok, ta sorkari Rajya Sabha senden nung metetdaksü.

2026 küm tenzüker tang tashi nung Ato kilonser Modi-i linük balala semdangba mapang nung sen crore 74.58 indokogo.

July 6 nungi July 11 tsüngda kija nunga Ato kilonseri Indonesia, Australia aser New Zealand linüktem semdanga liasü.

Rajya Sabha nung MP Sanjay Singh aser MP V Sivadasan nati 2021 küm nungi tenzüka Ato kilonser Narendra Modi-i linük balala semdangba aser iba mapang nungji küm sasap nung aser linük sasap nung sen indokba osang tejangja asüngdanga liasü.

Minister of State for External Affairs, Pabitra Margherita-i, "2021 küm nungi tenzüka Ato kilonser Modi-i bendang linüktem semdangba aser linüktem semdangba shia aser küm sasap nung senotsü indokbaji Annexure-I nung shia lir. Medemdangtsü atema, tamalen Ato kilonseri bendang linüktem semdangba mapang nung sen indokbaji yamai liasü-sen 10,74,27,363 (USA, 2011),

sen 9,95,76,890 (Russia, 2013), sen 8,33,49,463 (France, 2011) aser sen 6,02,23,484 (Germany, 2013) liasü," ta metetdaksü.

2025 küm Modi-i bendang linüktem semdangba nung sen crore 187 indok. Yaküm France semdangdang sen 25,59,82,902 indok, US semdangdang sen 16,54,84,302, Saudi Arabia semdangdang sen 15,54,03,792.47, Brazil semdangdang sen 17,72,22,144, China semdangdang sen 10,59,90,561 aser UK semdangdang sen 9,91,55,061.39 indok.

Iba dak alia 2025 küm Modi-i semdangba linüktemji Mauritius, Thailand, Sri Lanka, Cyprus, Canada, Croatia, Ghana, Trinidad and Tobago, Argentina, Namibia, Maldives, Japan, Bhutan, South Africa, Jordan, Oman aser Ethiopia linüktem liasü.

2021 nungi 2024 küm tsüngda Modi-i linük balala semdangba mapang nung sen crore 295 indok. 2024 küm bendang linüktem semdangdang sen crore 109 indok. 2024 küm pai Russia, Ukraine, US aser Brazil densema linük 16 semdanga liasü.

2023 küm bendang linüktem semdangdang sen crore 93, 2022 küm sen crore 55.82 aser 2021 küm sen crore 36 indoka liasü.

NC-i Arlla 370 atema maneni raratsü: Farooq Abdullah

Srinagar, August 06 (Agencies): Brihostibarnü National Conference (NC) Tir, Dr. Farooq Abdullah-i, Arlla 370 atema NC-i maneni raratsü, ta metetdaksü.

Paisa, 2019 küm August 5 nü Arlla 370 agienba ya linük temzüng alema lir, ta ashi.

Osangbenertem den jembidang Abdullah-i, "Arlla 370 agientsü atema telemterba agiba ya linük temzüng alema. Iba Arlla tanaben angutsü atema party-i linük temzüng aser democratic inyakyim

kübok maneni inyaksü," ta metetdaksü.

Paisa, Arlla 370 akhangba ya Jammu & Kashmir state state jenjang akhangba den sendaktepa lir, ta ashi.

Bodhbarnü Parliament kima Opposition-i longkak aitba dak sendakba nung pai, ibaji ajanga iba onük ya linük yimtenren nung kanga tongtibat onük ka ta sayur, ta ashi.

Linük temzüng kübok Arlla 370 ajanga Jammu & Kashmir nem special autonomous jenjang agüja liasü, ajisüaka 2019 küm

August 5 anogo nung Centre sorkari iba Arlla agien. Iba mapang nungjisa Jammu & Kashmir aser Ladakh na ya Union Territories ana kümja liasü.

Iba mapang nungjagi tenzüka National Conference den külemi Kashmir Valley nung aliba regional party temi J&K nem tanaben state jenjang agüjang ta akhanger.

Taoba ita J&K Chief Minister Omar Abdullah den party lenirtem Delhi-i oa state jenjang tanaben agüjang ta takhangba agüja longkak aitagogo.



August 06, 2026 nü Amaravati nung Andhra Pradesh Chief Minister, Revanth Reddy aser US Ambassador to India, Sergio Gor na senden amendang tangokba noksa nung angur.



TIR YIMYIM YIMOBILEM (EDITORIAL)

DIMAPUR FRIDAY, AUGUST (LUROI) 07, 2026

Kechiba foothill Road nüngdaker ?

Yashi asenoki asenok nüngdak ataloka jajatsü atema foothill lenmang nüngdakba indang shisalemsatepogo aser ano maneni tanüa kasa foothill lenmang ya kechiba nüngdaker ta asenok külemi bilemdangner. Atangji, koba lenmang südirsüaka lenmangji nisung jajatsü asoshi lir, anungji foothill road ta ajaba tenemtsüng lenmang yaa Nagaland tesem ka nungi Nagaland tesem kati aodang Assam majangi lenmang tajungba aser tatsüba nung jajatsü asoshi nüngdaker. Idangjibo, asenoka Assam police-i memeintsü aser khua tebennütsü abentsü. Ibaji asenok ajaki angateta aliyong, iba tenemtsüng lenmang ya renemer yangji jajatsü yongyar. Ajisüaka, Foothill lenmang yagibo asenoki bilema yongyaba dang nungi tajangzük tuluba, teimba aser tajungba agütsütsü bilema lir, kechiyong iba lenmang yabo nisung jajatsüba kisüng masü saka iba lenmang yagibo asenok nem mapa agütsütsü aser sen aatsü lenmang aika lapoktsütsü. Ibaji kodang asenok nükla nung ataloka ngudir asenoki foothill lenmang ya tangsa renemjang ta kinü tanuri tetsü mama meshia ajepba ama jeba ayimtentüsü. Tangbo asenoki lenmang yanglutar ayuyonga kecha balaka jashia mebilemer, kechiyong asenoki iba lenmang yanglur külen iba lenmang ajanga angutsüba tajangzük aser temoatsüji asen nükla nung yimdangi arua mangur. Ibaji asenok dang architect engineer-i ki design yanglur sayuaka kiji komaka yanglutsüar asenoki mereprangtetba amai lir, kechiyong mangdang aser nükla yabo asenok tenük ana yagi masü temulungjang tenük agidang angur. Aji oda, asen mangdang aser nükla nung asenok meyong Foothill lenmang songjen ya Economic Zone ka kümer asenoki züsentetba aonsutsü aser süngjanglijang tapu balala lenmang piyong ayoktsü, iba lenmang lenjem shia nung chiyongdak aser süngojem dak lapoka alitsü, ano tesem tesadem nungbo dokan tajunga lapoktsü, gari totzü ayokdak aser electric gari charge asüdak station lapoktsü ta asüba tebilembatem mapa kümer angutsüla. Aji oda, Mon, Longleng, Mokochung, Wokha, Dimapur, Niuland aser Peren district-tem tsüngda anogo shia nisungtem oli aruli jajaba purtemji Foothill Road nung kechisarina ayokertem meyong customers akümtsü. Idangjibo, Naga nunger sen Naga nunger keti aotsü aser Assam nung Silonijan amabo mali amai kumadoktsü. Iba amaji kodang Foothill lenmang ya renemtetdir, idangjibo asen lu nung züsentetba chiyongtsü aser asen kidang metsütetba shirurutem dang masü saka arem nung süngolio ajak, amchi am dena agi sen akümtsü. Aji oda, kodang asen yimtak aser asen lu nung züsentetbatem ayok tenzükdir, idangjibo government-i meyanglutetyonga asenok dang alir company-temi asen alu lenmang dena yanglutsütsü aser item lenmang ajakji aluagi Foothill road nung jiloktsü. Atangji, shitakba agibo, ibai asen state government-i Nagaland nung Assam den artsüsa aliba lenden limatem ajunga ya Special Economic Zone (SEZ) kümdaktsür tenemtsüng lenmang nung gari ananabo kenyongi tsüiteptettsüsa yanglur alitsüba mapang ka lir. Aji oda, tangalen asünungbo governmenti lenmang yanglutsüba denji nübortem anisüngzüka amendak aser chiyongdak lapoktsü atema kiojen dena yanglutsür item mapa inyaksü jangrar lanurtem nem agütsür lila. Aji oda, tenemtsüng lenmang ama yangluba yagi nisung amenba aser khu abenba garitem jajatsü lapokba den külemi nübortem asoshi mapa, jobs, zünger mezüngma adokdaksütsü. Idangjibo, tazünger-a mazünger-a mapa manguba tebilemtsü malitsü. Item temoatsü aser tajangzüktemji magishi talangka asensasa asen timtema malitsüsa, asenokbo government den yaritepa tang yanglutar aliba foothill lenmang ya tama renemtsü asoshi lenmang bushitepdü.

OLEMSABANG

LONGJEMBA AGI NOKDAKER SAKA LEMSABA AGI LAOR

~ L. Kika Pongener

Shin o ka...."Longjemba agi nokdaker; saka lemsaba agi laor". Koba linuk aser lokti kenbang-opang ka ser longjemer lidir; iba linuk aser lokti-ji tashi-ita alitsü. Ajisuaka, koba linuk aser lokti nung telongjem raksadir iba linuk aser lokti-ji lemsatsü. Yisu alima nung alidang; pai temenen tanelatem aritokba Farise-temi ngua; Yisu-i temenen tanelatemji aritoker masü; saka temenen tanela chuba Belzebub-i dang aritoker ta ashiba; Yisu-i langzüa yamai ashi...."Koba yimli pei anema lemsadir laor; aser yimti mesura kibong kobasa pei anema lemsadir menokdaktettsü" (Mathi-12:25). Temenen tanelai temenen tanela aritokra....Parnok tsüngda telemsa adoktsü aser tashi-ita menokdaktettsü. Yisu-i ashiba ama....Koba yimden, koba yimti, koba telok aser koba kibong pei anema lemsadir....Iba yimden, iba yimti, iba telok aser iba kibongji yimjung nung sunepa malitsü.

Tejen putu nung Israel nunger otsü nung....Israel nunger chuba yimli (Kingdom) akang-akanga tashi-ita melentepa yimsusua arua aliba....Solomon'er jabaso Rehobom chuba mapang nung; Israel yimli ana küma lemsaba otsü angur. Rehobom chubai tebu den külemi alir tamburtemi shisatsü tajung agütsüba; iba shisatsüji magi;...Saka lanurtem shirnoki alima raksatsüsa shisatsü tamajung agütsü....Rehobom-i iba shisatsüji agir yimsu asüba agi....Israel yimli ana küma lemsatsüsa aküm. (2 Puti-10: 1-19). Rehobom chuba den Yihuda aser Benjamin kidong ana dang yutsür; tanüngba kidong ter Yerobom sulen ao. Yimden aser lokti nung tokolak kati tangari shisatsü agütsüba ajak kanga junga shisadanger; tajung o tamajung bendanga meteter dang agitsüla.

Laishiba nung züngdangra....Sayutsüngir Solomon-i ashiba...."Ka dang nungi ana tajungba; kechiaser parnoki inyakba asoshi taa tajung kar. Kechiaser parnok alangra kati pa medemerji mesotsü; saka kija alisang aiatai; kodang pa alangdir pa mesor shinga mali. Ano ana külemi mejangra parnok lem-lema lir; saka ka mesung mejangra koda alemtsü ? Aser nisung kati kija alir ka koka-ka; ana anema pai majettsü. Lisu asem mesentepba-bo yakta metokdanger" (Sayu -4:9-12). Nisung ana longjemra tangari mela-mela majettsü....Saka tena balala pilara....Tangari mela-mela ka khen ka khen ta akoktsü aser arok külem tangar küpoki ayitsü.

Tanü asen lima nung yimden, arogo, mungdang aser loktiliba aika; tema nungpo longjema lir amai; saka telung nungpo meputepi aliba angur. Tanü asen lokti nung kati ka küpok melitet; tuluba shisangtepba, tamapur raktepba; tambu raktepba, tashi raktepba; atsüngdoktsü merangba, lipoklisang otsü-olem tasen-tasen purateta zülutepba....Item kulitem yagi tanü asen lokti aika nung meputep, tsükchitep, mangatettep, telemsa tali adoker, ken o kaateper aser karbo lokti nungi jentoker. Ajisuaka, kanga junga shisadangra....Lokti nungi jentokba, temzüng-ozüng tesashi agi merenshiba agi lokti ka kodanga tashi-ita melongjemtsü aser meyanglutsü.....Saka "Teni atsük nung nuktzü aluba ama" kati ka tashi-shitepa aodang meyipier telemsa-ang tali akümtsü. Linuk tenzüker nujiso bushirtema telok aika küma lemsaba agi tanü tashi asen nukjidong metongtei iba jenjang nung lidagi. Yisu-i ashiba ama... "Koba yimli pei anema lemsadir laor" (Mathi-12:25).

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Operation Blessing Philippines ministry kûm 30 jungogo



Manila, August 06 (Agencies): Operation Blessing Philippines-i tesüiba kûm 30 tashi Khrista tiyongtsü südaksür temeim mapa balala inyaka aruba sülen kûm 30 ajungbamong amonger.

Philippines nung dang masü saka alima tesem balala nung tzü-mopung lendon balala agi kongshirtem, kanga sensakertem aser teyari nüngdakbapurtem aika nem parnoki teimla agütsüba den aika taneptsü nguogo.

1996 kûm Gordon Robertson-i Operation Blessing Philippines tenzüka liasü. Teyari nüngdakbapurtem nem teyari agütsütsü aser Tsüngrem temeim lemsateptsü nükjidong nung Operation Blessing ya tenzüka liasü.

Lendong balala atalokba mapang nung parnoki tzüyim ajanga, gari aser tayimtsü ajanga chiyungtsü, mozü aser kiojen asüba osettsüset aika bener oja yaritepa arur.

Operation Blessing Philippines tatong Tir, John

Dan-i, "Onoki parnok teka nung amer teyari agütsütsü atema maongka angur. Tsüngremi onok amshiba ya temoatsü ka lir," ta ashi.

Operation Blessing-i lendong agi kongshirtem dang masü saka program balala ajanga timtemertem tanaben takûm yangershiba nung yarir.

Iba organization-isa educational scholarships aser medical outreach program balala ajanga aika yaria arudar. Parnokisa tanur tebangmechi chimar asortem, tetsüng meshidak asortem aser tenük tapok asortem angati surgery agitsür.

Armed Forces of the Philippines nung General Medel Aguilar-i, "Nüngdakba mapang ajak nung Operation Blessing Foundation alir. Armed Forces of Philippines-i agütsüba Melungtet telok tajungtiba (Best NGO) sempet-a parnoki teti angur," ta metetdaksü.

Operation Blessing Philippines-i linük nung dang

masü saka Turkey, Indonesia, Guam, Taiwan, Saipan, Afghanistan, Iraq aser Ukraine densema linük aika nung lendong mapang nunga timtemertem nem teyari agütsüogo.

Hamas teloki Israel amakba mapang nunga Operation Blessing Philippines-i jenshia aliba kibong aika nem teyari agütsüogo.

Operation Blessing Philippines kûm 30 ajungba nüngtem nung parnoki ministry nem tenla agütsürtem, partners aser volunteers nem tetushi agütsü.

Operation Blessing Philippines tentetsang, Gordon Robertson-i, "Timtemertem tenzüksü aser aneptsütsü atema Operation Blessing Philippines ya tenzüka liasü, saka tanübo alima tesem ajaklen teimla agütsüba movement ka kûmogo. Tajabaji tejangja aser tesüba mapang Tsüngremi leniba ama tarutsü nunga Pai maneni asenok len anitsü," ta metetdaksü.

ANOGO ABEN TSÜNGREM DEN

Arogo Mapa

- Mathi 16:13-20

Arogo telung nung mangatetba jenti adoker aser mangatetbaji arogo indangji mangatetter. Lemang ka nung arogoji kechi asütsüla jangjar, saka arogo jagi kechi nung inyaksüla mejangjar. Iba dang tali arogoi inyaksüba koda inyaksü ibaji mejangjar.

Arogoji alima den alitsüla. Ibai tongtipang lir. Asenok Khristantemi, Khristan masüba pur dang nungi Khristantemji tajungba ta mela-mela obendang agütsür. Alima nung nisung telok ana kûma lemdanger lir ta asenoki jembir: Kûmzüka alir aser mekûmzüki alirtem, temeshipur aser temenen pur. Ibaji tamakitsü tangatetba lir. Asenoka temenen nisungtem lir. Asenoka tatok angutsü nüngdaka ali nung, asenoki tangar temenen atoktsü makok. Arogoi kodanga laji Kibur ta mebilemtsüla, saka kûmzüka lir ta bilemtsüla. Asenoki alima nüngdakba dang temaba nung masü, alima nüngdak den noktaka ali tashi Arogoji Khristar Arogo lir. Khristantem aser Khristan masübatem tepila tuluji ya, Khristantemi teyari kong nungi arutsü lemanji metet, Khristan masübatemi teyari lemanji memetet.

Item ya shisadangang. Arogoi shidak alimaji angatetta lir ta nai bilemer asü? Alima mapa nung Khristantemi koba tashi nung atentsüla ta nai bilemer? Noksa sayudak, sports, politics, education, arem wazüka ayuba nung koda? Tawa tanü sayutsüngibaren bilemdangang. Asenok mapaji Khristan mapa ta nai ashir asü? Kechiba?

Ne ochi nung ni aniang aser sayuang.

T.Ken 25:5.

Ochi Tanelai nenok ochiba dangi anitsü.

Yohan 16:13.

Evangelical Kurdish Arogo nung pastor Nihad Hassan chiokogo



Pastor Nihad Hassan (abelen) chiokba sülen pa atema ken o jembitsür, Nazir Sheik Mohammad tena tangokba noksa nung angur.

August 06, 2026: Lebanon yimtiba, Beirut nung aliba Evangelical Kurdish Arogo nung tongti, Pastor Nihad Hassan, Syria nung pua liasü, ajisiüaka Hombarnü (August 3) pa asoba anogomong nung pa chiokogo.

Nihad Hassan ya Syria kübok Afrin Region nungi lir. July 19 nü pa apuba sülen Afrin Central Civil Prison nung puoka liasü.

Hassan-i Syria nung cybercrime ozüing alema inyak ta pai nem tai tongloksü. 2021 kûm Assad yimsüsüba mapang nung pai social media nung ozüing alema inyakogo ta pa nem tai tongloksü, ta Hassan atema ken o jembitsür, Nazir Sheik Mohammad-i metetdaksü.

Tepuokdak Hassan junga züngshiogo aser iba ken o angadangtsü atema pa Aleppo-i anir oa liasü, ta Mohammad-i

metetdaksü.

Court nung kuli balala agütsüba sülen Aleppo nung judge-i Hassan chioktsü, pa nem gari aser pa meyong oset ajak meyipa agütsütsü obendang agütsü, ta Mohammad-isa metetdaksü.

Hassa chiokba dak sendakba nung World Evangelical Alliance (WEA)-i, pastor Hassan ya tanela tsütsü lenir ka lir; pai Syria aser Lebanon naprongla nung jenshia aliba nüburtem anepalua yarir, ta metetdaksü.

WEA-i sangdong ka ajanga, pastor Hassan apuba ya yimsü temeden anema inyakba lir, ajisiüaka ketdangsertem aser court temi ken o shidak angadanga pa chiokba atema pelar, ta metetdaksü.

WEA-i, "Damascus nung sorkar tasenba kübok tayongzüka jenti ajangshibaji onoki meteta dang lir. Iba denji külemi telemsa aliba lokti ka nung ajak tesünep nung alitsü atema parnoki inyakba asoshi pelar," ta metetdaksü.

Khristan million 70-i Yirusalem nung yimjung atema sarasademtsü

August 06, 2026: Takûm tulu adoker. Day of Prayer for October 4 nü Yirusalem nung Peace of Jerusalem (DPPJ) 24buba Day of Prayer for Peace of Jerusalem (DPPJ) ayongzüka agitsü, aser iba sentong nungi linük 175 nungi Khristantemi shilem agitsü imlar.

Bishop Robert Stearn-i aniba Eagles' Wings ministry-i iba sentong ayongzüksü.

Iba dak alia Tower of David Jerusalem Museum nungi iba sentong live sayutsü, anungji Khristantemi online ajanga-a iba sentong nung shilem agitetsü.

Iba sentong nung shilem agirtem rongnung linük 50 aser Khristan denomination balala nungi lenir 500 densema alitsü aser linük balala nungi tongti ketdangsertem-a aika adentsü.

Eagles' Wings -i parnok indang website ajanga, "Sorkar ketdangsertem, pastor tem, tekülem aser tetushi lenirtem aser tamangertemi kodang kasa mapang nung aser kasa tesem nung nokdaker sarasademdir, iba mapang nungi temelenshi

Peace of Jerusalem (DPPJ) ajanga Khristan tekülem sentong nung medendanger yimsü lenirtem aser yimtenren lenirtem aika atsüer arur. Iba ya yimjung atema longjemer sarasademba mapang ka asütsü. Iba anogomong tashiji ibai lir," ta metetdaksü.

Osangbener den jembidang Brazilian Assemblies of God nung General Superintendent, Rev. José Wellington Costa-i, "Iba ya sarasademba sentong ka dang masü saka alimai 'Israel kija masü' ta sangdongba sentong ka lir," ta ashi.

"Yihuda nungertemi tayongzüka jenti ajangshiba mapang ka nung Khristan mission aikati Israel pusemer aser Yirusalem nung yimjung atema sarasademmer," ta pai ashi.

Tenüngsang Ken 122:6 ajanga tamangertem dang 'Yirusalem nung yimjung atema sarasademtsü' tuyur, iba dak alia Israel moatsütsü tuyur.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Zülusem

(adv) enoksema zülü (added in writing)

* Arogo otsü nung lipok otsü dena zülusem.

Züluten

(v) kaket nung bendena zülü (keep on written record)

* Talibai tar nunger otsü aika bendena züluten.

OLONG PAITEP # 7590

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7589 TELANGZÜBA

TIPIEN :

1. Telok, 4. Aluru, 6. Ozüng, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kiochtsü,
5. Lenti, 7. Tajangzük, 11. Teronem,
12. Sempa, 13. Jahaz.

Hailakandi nung aiür chanu ka tashiyim agi medemer tepsetba ken o nung nisung pongu puogo

Guwahati, Luroi/August 6 (Agencies): Assam, Hailakandi district nung Katlicherra Police Station kübok Aloichhara nungi Class IX nung azünger arishi küm 15 tain aiür chanu ka shi nung tashiyim agi medemer tepseta toktsüba ken o nung juvenile ka densema police-i nisung pongu puogo.

tetsürla tasümgang ya August 1 nü lar kidang ngutetba sülen iba tatalokba jangja aküm, aser iba ajanga Hailakandi aser Barak Valley kübok tesem balala nung nüburtem mit adoka longkak aita liasü.

Osang angazükba sülen Katlicherra Police-i bushisüngdang aser police ketdangsür tejentemi iba tesem semdanga asadang. Kuli aser scientific inputs tem bendentsü atema forensic team-a ka yoka liasü.

Post-mortem examination agiba sülen tetsürla ya masü tsüngda tashiyim agi raksatsüba ngutetogo aser police-i aibelena alirtem

putettsü atema jenjang agia liasü.

Ken o bushisüngdangtsü atema Additional Superintendent of Police (Crime)-i anir Special Investigation Team (SIT) ka tentettsüogo. Iba team yagi mezüng temulung melemi bilemer asem apu aser iba sülen ano nisung ana pua liasü.

Pua alirtem rongnung pezübo nisung tain aser ka juvenile lir. Police-i ashiba agi, bushisüngdang ajanga ken o aika jangjaogo aser pua alirtem rongnung karibo asüla ya meteter liasü ta ngutetogo.

Bushisüngdangertemi lenla ajak nungi ken o bushisüngdangdar. Ajisüaka police ketdangsürtemi ashiba agi, ken o ano metembang aser maneni bushisüngdangdar.

Nisung tain pezü ya okakdaki anirogo aser police ket nung ayutsü tetuyuba agütsüogo. Kasa mapang nung juvenile ka ya Juvenile Justice Act kübok provision tem dak ajemdaker observation home kati yokogo.

Imphal airport nung Police-i IMFL bottle 519 apu

Imphal, Luroi/August 6 (Agencies): Democratic Students' Alliance of Manipur (DESAM)-i teyari agüja Police aser security force temi August 5 nü Manipur kübok tesem balala nung anti-liquor operations ka benoka inyakba mapang Indian Made Foreign Liquor (IMFL) bottle 519, local yi aika puogo aser nisunga aika sota yuogo.

Meita aoba sentong tulutiba ya Imphal International Airport nung benoka inyak, kong DESAM-i osang agütsüba dak ajemdaker police-i IMFL bottle 519 puogo. Yi ya IndiGo tayimtsü ka nung Delhi nungi bener aruba liasü.

Meita aoba sentong temangba sülen iba ken o dak sendakba nung police-i tebur trok aser tetsür teku ta nisung

15 sota yuogo. Police-i apuba yi aser nisungtem ya Singjamei Police Station nem bendanga agütsüogo.

Police-i ashiba agi, parnoki apuba yi rongnung jenjang tasak yi Jack Daniel's, Jameson Whiskey, Johnnie Walker, Glenlivet, Glenfiddich, Monkey Shoulder, Glenmorangie, Black Label, Absolut Vodka, Smirnoff, Jacob's Creek Wine amala densema liasü.

Tanga meita aoba sentong ka benoka inyakba mapang police-i Thongjao Mamang Leikai nungi Leimapokpam Olin Meitei (34) Waikhong Police Station kübok Aihang tesem nung puogo. Police-i pa ket nungi tasaba yi liter 290 aser Maruti Alto (MN03P-5884) ka puogo.

Kasa mapang nung Imphal

West nung Patsoi Police Station kübok Patsoi Lamkhai aser Khumbong Bazar meita aoba mapang local yi liter 310 puogo.

Security force temi Nambol Police Station kübok Nambol temeket meita aoba mapang yi liter 98 puogo.

Maneni Kakching Lamkhai nunga police-i Maruti Swift ka nung miima bener aliba yi liter 429 pua liasü.

Iba dak sendakba nung Andro Kharam Leikai nung alir Hijam Yohenba Singh (25) aser Ningthoujam Joykumar Singh (44) na puogo.

Police-i ashiba agi, ozüng alema yi shilebenba, ayokba aser lemshiba anema jenjang agia aliba nung shilem ka ama iba meita aoba sentong ya benoka inyakogo. Ken o maneni bushisüngdang südar.

Meghalaya: CEO-i Draft Electoral Roll 2026 sangdongogo

Shillong, Luroi/August 6 (Agencies): Office of the Chief Electoral Officer (CEO), Meghalaya-i Bodhbarnü Assembly constituency 60 atema Draft Electoral Roll 2026 sangdongogo, aser Special Intensive Revision (SIR) kübok claims aser objection tem benoktsü atema inyakyim tenzüksüogo.

Chief Electoral Officer B.D.R. Tiwari-i ashiba agi, draft electoral rolls ya Election Commission of India inyakyim kübok renemogo. Electoral rolls ya District Election Officers (DEOs), Electoral Registration Officers (EROs) aser polling station ajak nung angutsü.

Electors temi August 5 nungi September 4 nü tashi nung claims aser objections tem benoktetsü.

Maneni draft rolls ya national aser state political party tem nema lemtsüogo.

Tiwari-i ashiba agi, Special Intensive Revision kübok ki shi-i tua elector tem asadangba, enumeration form tem lemtsüba aser Meghalaya nung registered elector 23,49,645 digitised asüba densema lir.

CEO office-i sangdongba data nung elector 7,75,665 (33.01%) SIR 2005 database nung keta aliba electoral records dak ajemdaker semdakteptsüogo. Ano elector

11,70,792 (49.83%) parnok tsürapur mesüra tetsü tebou electoral records amshia züngoksemogo.

Ajisüaka elector 2,22,786 (9.48%) SIR 2005 database den mesendakteptsütet aser parnok ya 'No Mapping' category nung tokja lir.

Revision mapang elector 1,80,402 (7.68%) maliba, tanga tesemi belener aoba, asüba, Duplicate (ASDD) category-i idaktsüogo.

Chief Electoral Officer-i ashiba agi, No Mapping aser ASDD category kübok aliba elector ajak electoral roll tatembangbuba mesangdong tsüngda kanga junga asadangtsü.

Train lenmang melenshiba aser athiba osang

Dimapur, Aug. 06 (TYO) :Dibrugarh - North Lakhimpur - Rangapara North - Rangiya - Guwahati- Rangiya-New Bongaigaon ajanga train lenmang melenshiba:

* Train No. 12423 (Dibrugarh - New Delhi) Rajdhani Express; 07.08.26 nungi 09.08.26 nü tsüngda apusoba train.

* Train No. 20503 (Dibrugarh - New Delhi) Rajdhani Express; 08.08.26 aser 09.08.26 nü apusoba train.

New Tinsukia - North Lakhimpur - Rangapara North - Rangiya - New Bongaigaon ajanga train lenmang melenshiba

* Train No. 22502 (New Tinsukia-SMVT Bengaluru) Superfast Express; 07.08.26 nü apusoba train.

Dibrugarh - North Lakhimpur - Rangapara North - Rangiya ajanga traing lenmang melenshiba

* Train No. 15903 (Dibrugarh - Chandigarh) Express; 07.08.26 nü apusoba train.

* Train No.15909 (Dibrugarh - Lalgah) Avadh Assam; 07.08.26 nungi 09.08.26 tashi nung apusoba train.

Dibrugarh - North Lakhimpur - Rangapara North - Rangiya ajanga train lenmang melenshiba:

* Train No. 15960 (Dibrugarh - Howrah) Kamrup Express; 07.08.26 & 08.08.26 nü apusoba train.

* Train No. 15946 (Dibrugarh - LokmanyaTilak Terminus)

Express; 09.08.26 nü apusoba train.

* Train No. 22504 (Dibrugarh - Kanniyakumari) Vivek Express; 07.08.26 nungi 09.08.26 tsüngda apusoba train.

* Train No. 15949 (Dibrugarh - Gomtinagar) Amrit Bharat Express; 07.08.26 nü apusoba train.

Moranhat leni yokba train:

* Train No. 15604 (Ledo - Guwahati) Intercity Express; 07.08.26 nungi 09.08.26 tsüngda apusoba train.

* Train No. 75602 (Tinsukia - Lumding) DEMU; 08.08.26 aser 09.08.26 nü apusoba train.

* Train No. 15968 (Ledo - Rangiya) Intercity Express; 07.08.26 nü apusoba train.

* Train No. 55914 (Tinsukia - Jorhat Town) Passenger; 09.08.26 nü apusoba train.

* Train No. 15603 (Guwahati - Ledo) Intercity Express; 06.08.26 nungi 08.08.26 tsüngda apusoba train.

* Train No. 75601 (Lumding - Tinsukia) DEMU; 07.08.26 nungi 09.08.26 tsüngda apusoba train.

* Train No. 15967 (Rangiya - Ledo) Intercity Express; 09.08.26 nü apusoba train.

Diversions of Trains via Rangiya - Rangapara North - North Lakhimpur - Dibrugarh:

* Train No. 15959 (Howrah - Dibrugarh) Kamrup Express; 06.08.2026 aser 08.08.26 nü apusoba train.

* Train No. 22503 (Kanniyakumari

- Dibrugarh) Vivek Express; 06.08.2026 nü apusoba train.

* Train No. 12424 (New Delhi - Dibrugarh) Rajdhani Express; 06.08.26 nungi 08.08.26 tsüngda apusoba train.

* Train No. 15910 (Lalgah - Dibrugarh) Avadh Assam Express; 04.08.26 nungi 06.08.2026 tsüngda apusoba train.

* Train No. 20504 (New Delhi - Dibrugarh) Rajdhani Express; 07.08.26 nü apusoba train.

* Train No. 13282 (Rajendra Nagar Terminal - Dibrugarh) Express; 8.08.2026 nü apusoba train.

* Train No. 15934 (Amritsar - New Tinsukia) Express; 07.08.2026 nü apusoba train.

* Train No. 15945 (LokmanyaTilak Terminus - Dibrugarh Express; 05.08.2026 nü apusoba train.

Train athibatem:

* Train No. 55914 (Tinsukia- Jorhat Town) Passenger; 07.08.26 nü apusoba train.

* Train No. 55913(Jorhat Town - Tinsukia) Passenger; 07.08.26 aser 08.08.2026 nü apusoba train.

* Train No. 75602 (Tinsukia - Lumding) DEMU; 07.08.26 nü apusoba train.

* Train No. 55909(Simaluguri - Dibrugarh) Passenger; 07.08.26 nü apusoba train.

Running of Train:

* Train No. 15669 (Guwahati - Dibrugarh) Nagaland Express; 06.08.26 nungi senzütsü.

Myanmar tir Min Aung Hlaing-i Thailand semdang

Bangkok, Luroi/August 6 (Agencies): Taoba Myanmar junta tekolakba tir Min Aung Hlaing-i Brehostibarnü Thailand semdangogo. Myanmar nung civil war adoker aliba tembangdakja yimjung bener arutsü aser parnok tanaben ASEAN nung shilem agidaktsütsü atema Bangkok-i nongshia aliba mapang tang pai iba linük semdangogo.

Taoba mapang general, shibai anir 2021 küm linük nung sorkar atsünga liasü, pa nem anüölen aliba linüktem aikati tenokdangba agütsür lir aser pa April ita Myanmar tir akümba sülen, linüktem nem pa agizükdaktsütsü merangba mapang ka lir. Opposition tejangja ka maliba mapang army-i teyari agütsüba party temi election ya ayong ayonga koka liasü.

Bangkok tonga aruba sülen Min Aung Hlaing ya Thai Ato Kilonser Charnvirakul den red carpet ka nung jaja ao aser guard of honour ka asadangba sülen ketdangsürtem den ajurutepa liasü.

2021 küm coup sülen

Myanmar nung rara tulu adoker aliba mapang, ASEAN-i benoka aliba yimjung atema inyakyim nung kidanger linük ya shilem agidaktsütsü atema Thailand-i nongshia arudar. Yimjung atema inyakyim bangdaker aliba ajanga ASEAN temulung masür, aser parnoki Myanmar nunger lenirtem parnok indang sendentem nung adentsü memelar.

Anutin den sensaksema mapang Min Aung Hlaing-i yimjung atema inyaktsü aser Association of Southeast Asian Nations züngsem 11 den tesendaktep yanglushitsü tenangzüka agüja liasü.

"Myanmar democracy lenmang nung jajadar aser tarutsü tajungba ka dangi odar," ta pai ashi.

"Onoki tesendaktep yanglushitsü atema inyakdar. Onoki ASEAN den tesendaktep tajungba küma yanglushitsü atema jenjang agidar," ta paisa shisem.

Tir ama pa jenjang agizükdaktsütsü atema China, India aser Laos semdangba sülen tang Thailand semdanger.

Kasa mapang nung ASEAN-i Myanmar nung election agiba ya magizüker aser yimjung atema inyaktsü nongshidar, koba Naypyitaw mangai arudar. ASEAN indang special envoy Maria Theresa Lazaro-i taoba ita ashiba agi, Myanmar-i yimjung atema sentong benoker aliba sülen anidaker manidaker aji asadangogo, aser tensendaktep yanglushitsü atema ano talang ka lir.

Civil war mapang nüburtem dak tashiyim benshiba atema Myanmar military ya rights groups aser anüölen aliba linüktemi aija arudar, koba parnoki magizüker. Conflict monitor kati taoba hopta ashiba agi, anüng ajanga bomb pokloktsüba densema civilian tem amakba tali küma odar.

Thailand-i jenjang balala agiba ajanga ASEAN den tesendaktep yanglushitsütsü akok, saka parnokia Min Aung Hlaing tir ama agizüksü asoshi kanga kümdanga inyaksangshidar, ta Thammasat University nung Southeast Asia expert Dulyapak Preecharush-i ashi.

Myanmar nung rara tembangtsü atema tejangzüka ka makai Min Aung Hlaing agizüka aser linük nung mepetmesü tulu adoker aliba sentoka toktsüba atema activist temi Thailand sorkar aija arudar.

"Thailand-i rule ?of law aser parnok indang human rights obligations sentoka metoktsütsüla aser Myanmar military dang civilian tem amakba anentsü atema ayongzüksüla," ta Amnesty International-i ashi.

Brehostibarnü Min Aung Hlaing aser Anutin na Thailand-Myanmar business summit ka nung shilem agiogo, kong tenati sector balala nung teka amteper inyaktsü aser bilateral trade ya kümshia USD billion 12 agi ajungkettsü atema nangzüktepogo.

Thailand ya Myanmar nung sen timtiba entokertem rongnung pongububa nung lir. Parnoki energy, hotels, ?banking aser manufacturing nung sen entoka inyaksangshir, saka civil war adokba ajanga tetsükdaktsü adokogo.

Rara ajanga arrtsü nung

shishilemba dak kongshioغو aser anüölen aliba linüktemi tenokdangba agütsüba ajanga Thai nunger Firm tem atsüngintsüsa kümogo.

"Linük ana rongsenketzüng nung tesendaktep nung tapak tasen ka lapoktsü atema renema lir," ta Anutin-i senden nung ashi.

Kasa mapang nung Min Aung Hlaing-i ashiba agi, shishilemba balala aser Dawei terenlok atema sendaktepa inyaktsü atema Myanmar-i mulunga lir. Dawei ya industrial zone ka lir, kong deep-sea port ka yanglutsü aser Indian aser Pacific Oceans na sendakteptsütsü asoshi lenmang ka yanglutsü sentong lir.

Thai Foreign Minister Sihasak Phuangketkeow-i ashiba agi, Brehostibarnü sensaksem kanga tajangzü ka-a kaogo aser Bangkok-i ASEAN ajanga Myanmar nung sensaksemtsü atema teyari agütsüner.

"Onoki Myanmar tir dang Myanmar ya ASEAN-i meyipa anir aruner ta shiogo," ta pai ashi. "Onoki onok temeket nung tatalokbatem sentong metoktsüner."

Congo nung health worker temi taah magütsüba atema longkak ait

Kinshasa, Luroi/August 6 (Agencies): Ebola tashidak pokteter aliba teyongtsü nung Congo nunger health worker tem aikati parnok taah khanga longkak aitogo. Teyari agütsürtemi ashiba agi, iba tashidak ya maneni prokshia odar.

Linük nung hopta ishika tejakdang taah magütsüba atema health worker temi longkak aitba sülen Ituri province yimtiba Bunia nung health worker tem ya pei mapa toktsürtem tem rongnung tatembangbuba telok lir.

Yimti nung Brehostibarnü Angh office kima longkak aitba mapang parnoki ashiba agi, tashidak poktetba May ita tom nung sangdongba sülen parnok nem tang tashi taah aser bonus tem magütsüi lir.

"Iba ama dang inyaksangshira iba province nung Ebola tashidak mazüoktettsü," ta longkak aitertem rongnung Edouige Makosi-i Associated Press news agency dang ashi, "Ken o takaratiba nung bentettsü atema onoki ketdangsürtem dang jenjang ajak nung shilem agitsü tahkangba agütsüogo."

Ketdangsürtemi taoba mapang taah menoa magütsüba ya logistical ken o dak tai tonglokja liasü. Ken o dak sendakba nung Congo nunger ketdangsürtemi kecha telangzüba magütsü. Tashidak pokteter aliba

mapang front-line worker tem nem tagütsütsü tim magütsüba ya tebilemstsütem rongnung tongtibangtiba ka lir. Tashidak kanga mejungi pokteter aliba tesemtem nung telungpurtem aser nüburtemi health worker aser facility balala maka arudar.

Tashidak menar 3,973 ajungba den nisung 1,801 asüba jangjaba sülen tang health worker temi longkak aitar.

2014 nungi 2016 tsüngda Africa anüölen Ebola tashidak pokteta nisung 28,000 dak tema iba tashidak menaba den nisung 11,000 dak tema asüba sülen tang tashidak tamajungtiba pokteter lir.

Sorkar data ajanga shiranger 674 lokti nungi pilar yua aliba sayuogo. Parnok ya timba Ituri nungi lir. Kasa mapang nung tashidak mena alritem den ajuruteper alir nisung 75 tang tebushidak lir, ta data ajangsa sayuogo.

World Health Organization (WHO) Director-General Tedros Adhanom Ghebreyesus-i Bodhbarnü DRC semdangba mapang tashidak den raratem kanga junga anepalutsü aser parnok nongita yaritsü atema mepeshia metetdaktsüogo.

Medical charity Doctors Without Borders-i iba hopta ashiba agi, tashidak ya tetsübutsüka prokshi odar, aser teyari ya lokti ajak nembo magütsüteti arudar.

GOVERNMENT OF NAGALAND

DIRECTORATE OF EMPLOYMENT, SKILL DEVELOPMENT & ENTREPRENEURSHIP

NAGALAND: KOHIMA

NO.DET-2/14/2001/PT-II/823

Dated Kohima, the 6th August 2026

RE-ADVERTISEMENT

In continuation to Advertisement of even numberdated15/06/2026, some seats are still available in the following Govt. ITIs. In this regard,eligible candidates may contact Principal/Officer-in-charge of the concerned Govt. ITI for selection/ admission along with relevant documents on first come first serve basis, **from the date of publication of this advertisement till 25th August 2026.** Further, candidates who are not selected in the recently concluded Entrance Test, if interested may also apply in other ITIs in their preferred trades, where seats are available.

Note : * All other conditions remain the same as advertised earlier.

SESSION : 2026-2027/28

Sl.No	Trades	Duration of Course	Minimum Educational Qualification	Name of Govt. ITIs	
A. Engineering Trades				* NCVET	** SCVT
1.	Wood Work Technician	1 year	8 th Passed	Mon. Phek, Wokha, Tuensang, Kiphire	-
2.	Plumber	1 year	8 th Passed	-	Zunheboto.
3.	Welder	1 year	8 th Passed	Kohima.	-
4.	Mechanic Diesel	1 year	10 th Passed	Kohima.	Tuensang
5.	Electrician	2 years	10 th Passed with Science as one of the subject or its equivalent	Wokha	Tuensang, Zunheboto
6.	Draughtsman(Civil)	2 years	10 th Passed with Math & Science	Kohima	-
7.	Mechanic Motor Vehicle	2 years	10 th Passed with Science as one of the subject or its equivalent	Kohima	-
8.	Mechanic Motor Vehicle	1 year	8 th Passed	-	Mon
9.	Surveyor	2 Year	10 th Passed with Math & Science	Kohima	-
B. Non- Engineering Trades.				*NCVET	*SCVT
1.	Cosmetology	1 year	10 th Passed	Kohima	-
2.	Computer Operator & Programming Assistant(COPA)	1 year	10 th Passed	Mokokchung, Zunheboto, Mon,	-
3.	Knitting	1 year	8 th Passed	-	Kohima
4.	Sewing Technology	1 year	8 th Passed	Mon, Chümoukedima, Kiphire.	Tuensang, Phek, Zunheboto.
5.	Stenographer Secretarial Assistant	1 year	10 th Passed	-	Chümoukedima, Mokokchung.

* NCVET- National Council for Vocational Education and Training (Under Central Govt.)

** SCVT- State Council for Vocational Training (Under State Govt.)

Sd/-
SAVIO VISA
Director



GOVERNMENT OF NAGALAND

DIRECTORATE OF TECHNICAL EDUCATION

Nagaland : Kohima - 797 004



Tech Edu

Dt. Kohima, the 6th August 2026.

NOTIFICATION

NO.DTE/ESTT-2/NEET/02/2026/

In continuation of this Office Notification of even number dated 31st July 2026, it is hereby notified to all applicants of **NEET UG-2026** and **Non-NEET UG-2026** candidates that the **corrected State Final Merit List** for both **NEET UG-2026** and **Non-NEET UG-2026** has been uploaded on the Department's website: www.dte.nagaland.gov.in and Department Notice Board.

Further, the schedule for **State Counselling** shall be notified in due course after the receipt of seat allotments from the concerned Ministry/State authorities.

(Er. VIPULHOU LHOUNGU)
Director

Salah-i Trabzonspor den küm ana atema tenangzüktepba yanglu



Luroi/August 6, 2026 (Agencies): Mohamed Salah-i taruba season nungi tenzüka Turkiye nung asayatsü atema Trabzonspor den küm ana atema tenangzüktepba yangluogo.

Taoba season tembangba den Liverpool toktsüba sülen Egypt nunger international asayar Salah ya free agent ka liasü. Pa Bodhbarnü Istanbul-i oa Trabzonspor den tenangzüktepba yangluogo. Pa

ya fan temi kanga pelashishia agizüka liasü.

Arishi küm 34 tain Salah ya Liverpool nungi asayaba mapang Premier League nung asayar tajungtiba rongnung ka aküm. Iba club nungi asayaba mapang pai league title ana aser Champions League-a ka koka liasü.

Merseyside club nungi asayaba mapang pai asaya 442 nung goal 257 idaktsü aser pa ya asayartem rongnung

tajungtiba ka ta züngshir.

Pa Liverpool den tenangzüktepba yangluba ano küm ka anunga liasü, saka pai March ita club toktsütsü ta sangdonga liasü. Taoba season pai goal 12 dang idaktsü aser coach Arne Slot dena mangatetep adoka liasü.

Trabzonspor club yagi Turkish league tenetben koker lir aser taoba season parnok tasembuba nung tembanga liasü.

Pakden Test asayamung atema England squad sangdongogo

Luroi/August 6, 2026 (Agencies): Pakistan den Test asem asayatsü aliba atema England-i asayar 16 tenüng sangdongogo. Iba asayamung ya iba ita tatemlen tenzüksü aser ICC World Test Championship cycle nung shilem ka asütsü.

Ben Stokes asaya nungi anenba den head coach Brendon McCullum-i mapa toktsüba sülen lenir tasentem kübok England team iba asayamung nung mezügbuba asayatsü lir.

Ollie Pope, Dan Lawrence aser Sam Cook nunger ajak Test squad-i meyipa aruogo aser Jordan Cox-a team nung züngoksemba sülen pa No. 3 nung batting amentsü imlar. Jacob Bethell yiruba ajanga masayatetsüsa akümba sülen Cox asayatsü asoshi maongka nguogo.

New Zealand makokba sülen England team iba asayamung asayatsü lir aser parnok captain Joe Root aser interim head coach Marcus Trescothick na lenisüba nung asayatsü.

Root shiba July ita captain asütsü asoshi tanaben shimshiogo, pa nem captain mapa agütsüba sülen tang mezügbuba England team asayatsü lir. Fleming shiba McCullum melena shimogo, pa December ita South Africa den asayaba mapangang shilem agitsü.

Mezügbuba Test ya Headingley nung August 19 nü tenzüksü. England-i squad nung asayar 16 shimogo, anungji iba ajanga Root nem asayar shimtsü atema maongka peria agütsüogo.

Stokes' asaya nungi anenba sülen all-rounder ka medeni team liromedema yanglutsü atema tongtibatang telemtetba agitsüsa akümtsü.

Squad nung Shoaib Bashir ya England indang spinner tongtibatang asütsü, aser Lawrence-a County Championship, Division One

nung run timtiba yangluba agi dang masü saka pai off-spin-a ontetba ajanga squad nung züngoksemogo, aser iba ajanga England nem fast bowler pezü asadaktsütsü asoshi lenmang lapoktsütsü. Pa No. 6 nung batting amentsü imlar.

England squad: Joe Root (captain), Jofra Archer, Gus Atkinson, Shoaib Bashir, Harry Brook, Brydon Carse, Sam Cook, Jordan Cox, Ben Duckett, Matthew Fisher, Emilio Gay, Dan Lawrence, Ollie Pope, Ollie Robinson, Jamie Smith, Josh Tongue.

Telemtetba asadangshitsü atema AIFF-i Jamshedpur FC nem mapang apuloktsü

Luroi/August 6, 2026 (Agencies): 2026-27 Indian Super League (ISL) season nung shilem magitsü atema telemtetba agiba asadangshitsü atema All India Football Federation (AIFF)-i Jamshedpur FC nem August 12 nü tashi mapang apuloktsüogo.

AIFF Executive Committee nem iba osang ya Brehostibarnü metetdaksüogo. July 31 nü minlai lia Tata Steel meyong Jamshedpur FC-i taruba ISL season nung shilem magitsü telemtetba agia liasü.

Iba jenjang agiba ajanga asayar, coaching staff, veterans, fan aser club tem aoksadakja liasü.

Iba sülen fan temi longkak ait, online petition tem tenzüik aser Durand Cup nung SC Delhi

den asayaba mapang club kibur dang parnok telemtetba melenshitsü atema mepeshia banner tem saya liasü.

"ISL nung shilem magitsü telemtetba agiba ya club achaayangtsü atema JFSPL (Jamshedpur Football and Sporting Private Limited)-i senotsü peria mazüktetba ajanga lir," ta club CEO Mukul Choudhari-i AIFF dangi yokba email nung shia lir.

"Inyakyim ajak atema sen entoktsü asoshi JFSPL ya shareholder tem dak dang metaloker lir. Shareholder temi joko ojang dang senotsü agütsütetsü ta shiogo, kechiyong JFC pur ISL nung shilem agitsü atema business model ya tapet masü ta parnoki amanger," ta paisa shisem.

Badminton World Championships atema fixture sayaogo

Luroi/August 6, 2026 (Agencies): BWF World Championships koba taküm New Delhi nung asayatsü lir, iba atema Fixture sangdongogo. Asian Championships silver medallist Ayush Shetty atema mezügbuba round asaya kanga melarabo masütsü, kechiyong pa defending champion Shi Yu Qi den asayatsü lir.

Ayush asayar tajung ka den atar liaka PV Sindhu aser Lakshya Sen nungerbo rankings nung parnok dang nungi tekübokba jenjang nung aliba asayartem den ata lir.

Iba asayamung ya küm 17 sülen taküm India nung asayatsü lir. Asayamung ya August 17 nungi 23 tashi Indira Gandhi Indoor Stadium nung asayatsü.

Sindhu, shibai taoba ita Japan Open kokogo, la mezügbuba round nung Ireland tsür world No. 141 Sophia Nobel den asayatsü.

Lai asaya kokyonga tura pre-quarterfinals nung China tsür third seed Wang Zhi Yi den asayatsü akok aser quarterfinal nung sixth seed Putri Wardani den asayatsü imlar.

Tebur kija asaya nung Lakshya mezügbuba asaya Austria nunger asayar Collins Valentine Filimon den asayatsü. Pai asaya kokyonga tura pre-quarterfinals nung Thailand nunger second seed Kunlavut Vitidsarn den asayatsü.

India nunger asayartem rongnung mezügbuba round akoktsü atema Ayush atema tasakba asütsü. Pa Shi den asemben asayar lir aser asembenprongla makok.

Tebur tarep asaya nung

fifth seeds Satwiksairaj Rankireddy aser Chirag Shetty na mezügbuba round atema bye nguogo aser tena tanabuba round nung Scotland nunger Alexander Dunn aser Adam Pringle na mesüra Thailand nunger Chaloepon Charoenkitamorn aser Worrapol Thongsa-Nga na den asayatsü.

India nunger tarep atema asaya akoktsü tasaktibaji Indonesia nunger 12th seeds Raymond Indra aser Nikolaus Joaquin na asütsü imlar. Tena June ita Indonesia Open final tonga asayaogo.

Tebur tarep asaya nungsa MR Arjun aser Hariharan na mezügbuba asayar Ireland nunger tarep Scott Guilda aser Paul Reynolds na den asayatsü.

Tetsür kija asaya nung Unnati Hooda, Myanmar tsür Thet Htar Thuzar den asayatsü aser la tanabuba round nung 13th seed Michelle Li den asayatsü akok.

Tarep temeyoktep asaya nung 15th seeds Dhruv Kapila aser Tanisha Crasto na mezügbuba round atema bye nguogo aser tena pre-quarterfinals nung sixth seeds Guo Xin Wa aser Chen Fang Hui na den asayatsü. Rohan Kapoor aser G Ruthvika Shivani nata mezügbuba round Canada nunger Jonathan Lai aser Crystal Lai na den asayatsü.

Tetsür tarep asaya nung Commonwealth Games bronze medallists Treasa Jolly aser Gayatri Gopichand na Spain tsür Paula Lopez aser Lucia Rodriguez na den asayatsü, aser Simran Singhi aser Kavipriya Selvam nata Spain tsür Nikol Carulla aser Carmen Jimenez na den asayatsü.

BILEMDANGANG

"Meranga dang inyakra tamakok anguyonga kecha tesasa mali."